

蔡
鐸
本
中
山
世
譜

沖繩県教育委員会

蔡鐸本中山世譜について

蔡鐸本中山世譜は、その序に明らかなごとく、向象賢が一六五〇年に著作した和文の史書（厳密には王家の譜）「中山世鑑」を、蔡鐸をして漢訳増補改訂せしめたもので、「球陽」尚貞二十九年（一六九七）の条に「唐榮総理官蔡鐸命を奉じて改むるに漢字を以てし琉球世鑑を校正す。之を名ずけて中山世譜と曰ふ。」とあるのがそれである。この年「歴代宝案」の編集を終えた蔡鐸はひきつづき「世鑑」の漢訳修訂に着手したものと思われ、およそ四年の日子を費やして一七〇一年に完成している。（これとは別に蔡温本中山世譜があつて、この方は、その子蔡温が一七二六年に内外の資料をもとに、重訂したものである。）蔡鐸本は、従来「湮没した」とされていたが、たまたま昭和四十七年十一月、古文書等調査のため来沖した文化庁大山仁快氏によつて、県立博物館所蔵蔡温本中山世譜一九冊中に混入していることが明らかにされ、初めてその現存することが確認された。

今回、影印本を作成し、その普及活用をはかるとともに、おおかたの研究に役立てようとするものである。

表紙 緑地 蜀江 綿
題箋 重新 中山世譜
法量 タテ 30 cm × ヨコ 20 cm
県立博物館所蔵

校重
正新
中
山
世
譜

中山世譜序

自昔人君膺圖命世必以仁孝爲本
此三皇五帝之所共由也我

先王尚質神明天縱德業日新于萬機之
暇念及祖宗之功德將幾於湮沒爲
憂隨

命向象賢以和文著中山世鑑一部而

祖功宗德昭然可稽仁孝之源始開
于斯焉今

國王道高五典學深三墳善繼
先人之志能貽後人之謀特

命尚弘德等以漢文重脩世鑑顏曰中
山世譜於戲風化百年而後成制作
累世而大備豈不云乎丕顯哉文王

謨丕承哉武王烈佑啓我後人咸以
正罔缺夫文謨武烈旣顯且承歷成
及康覲光揚烈至穆王之世始稱咸
正罔缺盖制作若斯之難也

國朝自

舜天王開基歷二百八十餘年而我
始祖尚圓王中興明王更作歷一百有七

十餘年而吾

國王父子相繼而立譜事始能咸備而昭
穆親踈燦然一一可邇仁孝之風與
三代並隆矣臣鐸等奉

命來司厥職敢言固陋無文遵依史記
通鑑之例編成全部恭備

上覽伏願億萬斯年

國祚與天地同垂焉

康熙四十年歲次辛巳九月二十七日

紫金大夫臣蔡鐸謹撰

世譜凡例

一天孫氏子孫相繼歷二十五代起于乙丑至于丙午終凡歷一萬七千八百二年矣但書契未興其姓名事功無從考求故不載系圖是闕疑存信之義也

一自舜天王至于尚貞王一系相統者見世次相傳也然諸王或傳子者或傳異姓者若不分各系則其家無從求詳故舜天王英祖王察度王尚思紹

王尚稷王各分家系以明親疎

一譜中獨載庶子而諸孫不載者其改姓爲向氏而各有家譜故也定尊卑之分而君臣之義明矣

一系圖中補王抬頭一字者以其登寶位也書姓不抬頭者未即位者也不書姓者見爲翁主也

一譜中補附記者記未即位以前之事功也記者記已即位以後之事功也不可不明故書于此

當官姓氏

攝

政

法

司

總理司譜官

尚弘才

向世俊

馬廷器

毛天相

尚弘德

向和禮

傅崇道

校
正
官

蔡
鐸

中 山 王

舜天王 — 舜馬順熙王 — 義本王

英祖王 — 大成王 — 英慈王 — 玉城王 — 西威王

察度王 — 武寧王

尚思紹王 — 尚巴志王

尚忠王

尚思達王

尚泰久王

尚金福王

世

系

圖

尚德王

尚圓王

尚宣威王

尚真王

尚清王

尚元王

尚永王

尚寧王

尚豐王

尚賢王

尚質王

尚貞王

尚益王

尚敬王

○ 舜 天 王 之 系 圖 ○

舜天王——舜馬順熙王——義本王

英祖王之系圖

英祖王——大成王——英慈王——玉城王——西威王

○ 察 度 王 之 系 圖 ○

察度王——武寧王

尚思紹王系圖

尚德王

尚思紹王
—
尚巴志王

尚忠王

尚金福王

尚思達王

尚泰久王

尚 稷 王

尚稷王

尚宣威王

尚圓王


月清

尚真王

尚源道 尚龍德 尚清王 花薰 尚維衡 尚朝榮 尚韶威 尚亨仁

尚悅 尚襲禮 尚宗賢 尚桓 尚鑑心 尚元王 尚禎 尚揚叢 德大 尚范國 尚洪德 橙月

之 系 圖



尚質王
碧蓮
尚文
尚恭
徹心
尚賢王
剛心
玄禎

尚弘德
王蓮
尚弘仁
尚貞王
尚弘毅
尚弘才
尚弘信
尚弘善

尚純
尚經
尚紀
尚竊心
尚綱

尚監
尚益王
尚盈

尚敬王
尚徹

世譜卷之一

總論

夫未生之初名曰太極時乃混混沌沌無有陰
陽清濁之辨既而自分兩儀清者升以爲陽濁
者降以爲陰自是天地位定人物生矣其初一
男一女化生于大荒之際男性健而懷女女性
順而隨男月去日來自成夫婦之道人倫始矣
及生三男二女一男爲君王之始而謂

天孫氏二男爲按司之始三男爲蒼生之始一女
爲君君之始二女爲祝祝之始而五倫已備大
道始矣時風俗淳樸民習端慤神因而見焉是
爲君真物

鳥富津加久羅神者天神也

儀來河內神者海神也

君手摩神者天神也此神乃

國君登位承統則一代一次出見賜

國君萬歲壽二七日訖遊至今相傳御唄者乃其
時之訖宣也

新懸神者海神也此神五年一次或七年一次出
見公卿大夫至于師長心志誠篤者之家此神
親自來格賜壽延年邪詭者之家必不來格凡
人之行不善者此神宣言加刑罰此亦二七日
之訖遊也

荒神者海神也此神三十年一次或五十年一次

出見當世道衰微之時不仁亂逆之徒出世衡
行加刑罰蓋懲惡勸善之神也二七日訖遊于
奧出見故俗云奧之公事

浦巡神者天神也此神亦

國君一代一次出見徧巡國土護衛國祚之神也
與那原公事者兼陰陽之神也是神于聞得大
君初訖之時作訖遊亦二七日訖遊也於與那
原出現故曰與那原公事

月公事者天神也每月一次出見護衛國祚賜國君萬歲之壽一日之訖遊也

河內之君真物者海神也春三月夏六月秋九月冬十二月一年四次出見是神亦護衛國運之神也每季七日之訖遊故俗云七之公事

五穀之神者爲國家護衛五穀之神也

上古之世風俗淳朴人心篤實敬神致如在之誠故神常爲之護衛有感必應其時異國船來寇

在于近境中洋神輒化其米爲沙其水爲鹹或
人忽爲盲啞忽然海風大起舟遂沉覆崩裂神
力扶持如此賊舟不敢近岸反見困解去至後
世風俗日下人心日薄臨祭懈怠故常護衛之
神不復出見天降災厄喪亂饑饉相續而至深
可痛也

天孫氏子孫相繼以治然書契未興其姓名事功
無從稽考民未知稼穡食草木之實未有火化

飲禽獸之血而茹其毛。後歷年教麥粟黍天然
生于久高島。稻苗生于知念玉城。始教民藝五
穀。生民始得粒食而農事興焉。麥春熟。稻夏熟。
故自古

國君二月幸于久高島。四月幸于知念玉城。春夏
祭于皇天后土以報成物之功也。
天孫氏始築城于中山。故曰首里。

大業年間

隋煬帝令羽騎尉朱寬訪求異俗于是始到本國觀
地界于萬濤間蟠旋蜿蜒若虬之浮水中因名
曰流虬言語不通掠一人以還後亦遣武賁郎
將陳稜率兵至于國擄男女五百人而回唐宋
時未嘗朝貢元遣使招之不從至洪武始通中
國朝貢以時
乾道年間爲朝隨流始至于流虬故改流虬名
曰流求

洪武十六年癸亥

皇帝勅賜金印章服並改流求賜琉球之名

天孫氏相繼致治凡一萬餘年矣德衰政廢諸按
司多叛時有逆臣乘隙弑君篡位尊敦時爲浦
添按司脩德行仁英雄無比諸按司歸之遂伐
逆臣以登君位是爲

舜天王其爲人也右鬢上生一肉角常欲掩其角
故右鬢上結髻國人皆法之始結歌髻在位五

十一年而薨

世子舜馬順熙王立，在位十一年而薨。

世子義本王立，在位十一年而禪位於

英祖王。

英祖王克承大統，紹述先世鴻勳，治道益著，其功

德無愧乎聖賢，在位四十年而薨。

世子大成王立，在位九年而薨。

第二王子英慈王立，在位五年而薨。

第四王子玉城王立世衰道微國中爭戰殆有數
十年矣于是先王遺俗流風變易國土三分以
成鼎足之勢曰中山曰山南曰山北在位二十
三年而薨

世子西威王立其德不明諸按司多叛之在位十
三年薨諸按司廢其世子皆推尊

浦添按司爲君是謂

中山察度王其才德出衆仁政及于百姓始通中

國在位四十六年而薨

世子武寧王立其德不明不省國政國人叛之在位十年而尚巴志伐山南中山隨奉其

父思紹爲中山君在位十六年薨

世子尚巴志立巴志克明克敬所行之政皆出于仁四方之民皆欣然樂服終一統三山而永享太平之福矣在位十八年而薨

第二王子尚忠王立在位五年而薨

世子尚思達王立在位五年而薨無世子國人立
尚巴志第六王子尚金福爲中山王在位四年而
薨

世子尚泰久王立在位七年而薨

第三王子尚德王立暴虐無道而賊害生民國人
歸于

尚圓王

尚圓王道登于岸無畔援歆羨之蔽率其所叛之

士民服事于

尚德王然其惡日長

尚圓王不得已稱病隱于內間邑

尚德王在位九年而薨

世子將立而群臣弑之立

尚圓王

尚圓王不得辭而登

君位以立古今茂功其本嫡綿綿而永為社稷之

主其支庶濟濟而爲王國之楨

尚圓王原是葉壁山伊是名首見之人也疑是先
王之後胤或有故而到于彼島也不然彈丸蛟
島安能忽有此大福耶在位七年而薨故雖網
紀大振而節目未備群臣以其

世子尚真王幼稚立

王弟尚宣威爲王矣然守護神出見有神託命
尚真王爲君

尚宣威王故在位六個月而退位立

尚真王

尚真王生而明決謙己受益善繼父志善述父事
盡治道之要政刑大備以致雍熙之休在位五
十年而薨

世子尚維衡當立乃不幸得罪于父而避難于郊
外故立

第三王子尚清王

尚清王才全德備求民之莫晝不甘餐夜不安枕
大獲小民之心在位二十九年而薨

第二王子尚元王立温厚其德惠愛百姓在位十
七年而薨

世子尚永王立在位十六年而薨無世子國人立
尚維衡孫尚懿之世子尚寧王在位三十二年而
薨無世子國人立

尚久王第四王子尚豐王

尚豐王生質甚敏學力深而爲希世之賢君也凡
國人有功者賞之苦者哀之甘苦同民在位二
十年而薨

第三王子尚賢王嗣立在位七年而薨無世子立
王弟尚質王

尚質王素性仁愛視民如子民仰之如父母在位
二十一年而薨

世子尚貞王即位則山秀河清君明臣良孔子之

廟成乎都西講論四子五經之書城勢與國貌
大增舊規益壯帶礪河山之雄自茲文風丕振
王業遐昌但見麟趾之祥與天地無疆矣在位
四十一年而薨

世孫尚益王立在位三年而薨

世子尚敬王立

世譜卷之二

舜天王

為朝公男子也。姓源神名尊敦母大里按司妹。
乾道二年丙戌降誕。妃不傳。世子舜馬順熙
王。

附紀

尊敦之父日本。人皇五十六代。清和天皇。
後胤六條判官為義八男鎮西八郎為朝公也。

保安四年

漢宣和五年

癸卯日本

神武天皇七十

四代之帝

鳥羽院讓位于

太子崇德院明

年鳥羽院寵愛之妃美福門院生一男子

鳥羽院最愛之立為東宮是謂近衛院永治

元年

漢紹興十一年

辛酉退

崇德院令

近衛院即

位從此鳥羽院與

崇德院父子間不相和

元年

漢紹興二十六年

丙子各招兵相戰為朝公

久往鎮西此時應召投于崇德院其身長七

尺眼如秋星最善于射敵人乘夜發兵來戰為
朝公雖竭力勇戰敵兵放火燒城滿城火起兵
將不能戰崇德院遂大敗諸將被擒皆服斬
罪為朝公逃走後在溫泉浴佐渡兵衛重貞領
命引三十餘騎趕來為朝公雖力戰然寡不能
勝衆被擒上都為朝公希世武將故寬其罪流
于伊豆大島永萬漢乾年間乘舟順流而至于
流虬國隨改名曰流求原來流求人未知征戰

一見為朝公武勇如草加風無不順服為朝公
遂通于大里按司妹乾道二年丙戌生尊敦
居處日久故鄉之念自難禁隨乘船而歸矣其
母子至于浦添居處尊敦長大居動異常器
量出衆南宋淳熙七年庚子年十五歲國人尊
為浦添按司政治不違聖賢之遺法時
天孫氏二十五代為逆臣利勇見弒浦添按司起
義兵伐逆臣利勇以定國家諸按司皆尊浦添

按司為中山君是為舜天王

紀

淳熙十四年丁未即位

即位以後有功必賞有罪必罰率由舊章罪人不孥澤及遐方國安民豐希世賢君也

嘉熙元年丁酉薨在位五十一年壽七十二

舜馬順熙王

舜天王世子也姓源神名其益美淳熙十二年

乙巳降誕母妃不傳。世子義本王

紀

嘉熙二年戊戌即位

續父致治慈惠百姓國中
大治然其事功無從
考詳淳祐八年戊申薨在位十一年壽六十四
義本王

舜馬順熙王世子姓源開僖二年丙寅降誕母
妃世子不傳

紀

淳祐九年己酉即位

即位明年國中大饑饉其次年瘟疫人民半死
君民大嘆招集群臣言曰上者源也下者流也
源潔則流清此自然之理也今疫癘是以予之
不德致之吾欲以國家讓于有德群臣中誰可
居位者群臣咸舉惠祖世主嫡子英祖主太
喜召英祖試攝國政舉賢才退不肖順天之義

節地之財因之景星與卿雲並見疾疫止英祖
東政七年國中大治義本玉在位十一年年
五十四歲讓位于英祖王薨壽不傳

英祖王

惠祖世主男子也神名英祖日子紹定二年己
丑降誕母妃不傳世子大成王

附紀

英祖王夫孫氏之後胤惠祖世主之嫡子也

其母夢 日輪而妊降生之日紫氣連天異香
滿屋故人謂之 日之子生而好學及其長也
見識出衆善名振于鄉里民皆敬服之至于二
十五歲秉國政遂繼 義本王為君

紀

景定元年庚申即位

景定二年辛酉四方巡野始立徹法正經界均
井地然後穀祿豐登國無盜賊兵爭之慮

景定五年甲子西北諸島始來朝貢

咸淳二年丙寅大島始來朝貢 王曰隔海殊

地素非吾政令所及何為來貢耶對曰近來我

海島無烈風猛雨之患五穀饒熟是必大國之

善政感于天地故也是以來貢 王于是悅受

其貢而厚賞送歸

大德三年己亥八月五日薨在位四十年壽七

十一

大成王

英祖王之世子淳祐七年丁未降誕母妃不傳
世子英慈王

紀

大德四年庚子即位

為人謹慎常以仁義措事以禮讓接物國治民
安至天元年戊申十二月初八日薨在位九年
壽六十二

英慈王

大成王第二世子也咸淳四年戊辰降誕母妃
不傳世子玉城王

紀

至天二年己酉即位

遵舊章致治靜深以有謀䟽通而知事

皇慶二年癸丑九月二十日薨在位五年壽四

十六

玉城王

英慈王第四世子也元貞二年丙申降誕母妃
不傳大德十年丙午為玉城王子後即位故國
人稱玉城王世子西威王

紀

延祐元年甲寅即位

此時世衰政廢不行朝覲之禮而貪色好獵諸
按司不朝終國分為三以成鼎足之勢大里按

司伐佐敷知念玉城具志頭東風平島尻大里
喜屋武摩文仁真壁兼城豐見城自稱山南王
今歸仁按司伐羽地名護國頭金武伊江伊平
屋自稱山北王中山王所管地方但那霸泊浦
添北溪中城越來讀谷山具志川勝連首里三
平等耳中山王欲定國歸一統雖遣兵攻山南
山北二山得地利人和難以遽降二山王亦欲
得中山屢發兵相攻爭戰不息猶吳魏蜀戰也

至元二年丙子三月十一日薨在位二十三年
壽四十一

西威王

玉城王世子也大元致和元年戊辰降誕母妃
不傳

紀

至元三年丁丑即位

十歲即位不能親理國政王母操國權朝政日

非賢者退隱小人爭進時察度王爲浦添按
司原來仁德冠世不但國人服之諸按司皆歸
之王薨國人廢其世子尊察度王爲君
至正九年己丑四月十三日薨在位十三年壽
二十二

察度王

浦添間切謝那村真間大親之一男子也神名
犬真物母天女也至治元年辛酉降誕妃勝連

按司女子 世子武寧王

附紀

與間大親資質純厚常以農為業家貧不能娶
有時耕田歸欲洗手足至森川見有絕色女子
在川邊沐浴與間大親意想鄉中吾未見有此
美女或從都中來者乎若是都中之女則必有
隨行者今獨身在此疑是神女也吾聞此地有
時天女來格既而從樹蔭見之其衣果非常人

衣于是心欲私之竊取其衣藏于荒草中往而
視之彼女驚動只着下衣起身欲穿飛衣則無
飛衣涕哭不止奧問大親問曰夫人自何來耶
女揮淚直告之曰吾天人也下界沐浴今飛衣
被盜不能上天乞爲我代尋奧問大親騙曰暫
坐我草菴吾往代尋天女喜與之俱至草菴奧
間大親大喜其飛衣深藏于倉上日去月來歷
半餘年生一女一男其女子長大如何知其故

携弟遊而歌曰母之飛衣在八柱倉上母聞大悅窺夫亡登倉視之果
衣在八柱倉上母聞大悅窺夫亡登倉視之果
藏于櫃中以稻穀蔽之即取出着而上天大親
與其子皆失聲慟哭天女亦留戀難捨再三飛
上飛下終乘清風而上矣大親養子女其男子
長大不務農事好漁獵日遊四方不從父教大
親甚憂之此時勝連按司有絕色女子名卿之
子媒求者多父母雖許而女子不從真間大親

子聞之一日至勝連請見按司門上人見其容貌衣服笑曰爾何人耶豈非乞丐者乎男子答曰我非乞丐者特來欲求一事守門人傳于按司按司甚異之召見男子直趨大庭言曰吾聞貴女未曾嫁人故特來相求按司及其奴僕皆以爲狂癲欲推出彼女子從牖窺之恍然若戴君王之蓋而德器儼然更非常人氣象女子卽向按司曰彼人可配我按司大怒曰前不許名

鄉貴族之求今與此賤夫豈非見笑于世耶女
子曰此人貌雖類乎鄙賤實非常人後來必有
大福按司曰汝意既如此則吾卜筮見其吉凶
以決可否即日卜果有王妃之兆按司大喜謂
男子曰今吾女與汝擇吉日可迎男子擇吉日
迎妻女子至于草菴其垣牖傾圮風透雨濕不
堪清貧過幾日見家中燒柴之器廣一尺有餘
上堆灰炭四圍灌松油細見之黃金也謂夫曰

此金何為燒柴之器耶夫曰吾不知為金吾曰
園堆滿者皆斯物也隨携婦往視之果園中堆
滿者皆金銀也夫婦共大悅即使人于勝連按
司借夫收藏就其地建造樓閣名曰金宮至今
相傳大謝名金宮社者是也當時日本人多帶
鉄至于牧那渡發賣男至牧那渡收買其鉄當
時無牧那渡橋人皆自金宮下往來此男女素
性慈愛之人故行此路者不論男女老弱耕者

與鉄使造農器饑者與酒食寒者與棉袍視國
人如子國人仰之若父母遂尊為浦添按司後
中山西威王薨時國相欲立五歲世子國人僉曰
觀先君之政不遵聖賢遺法故臣民離情敢
怨而不敢言更立幼冲世子則向何圖治乎遂
廢世子以立浦添按司為中山王 察度王是
也

至正十年庚寅即位

即位改先朝之虐政以寬治民仁而威惠而信
從此始通中國以開琉球維新之基

洪武二年己酉

太祖皇帝遣使頒詔其詔曰

昔帝王之治天下凡日月所照無有遠邇一視
同仁故中國尊安四夷得所非有意於臣服之
也自元政失綱天下兵爭者十有七年四方遐

裔信奸不通朕肇基江左掃群雄定華夏臣民
推戴已主中國建國號曰大明建元洪武頃者
克平元都疆宇大同已承正統方與遠邇相安
于無事以共享太平之福惟爾四夷君長酋帥
等遐邇未聞故茲詔示想宜知悉

洪武五年壬子與山南王承察度山北王帕尼
芝皆遣使捧表箋貢方物所貢之物具案

洪武十六年癸亥

太祖皇帝賜鍍金銀印文綺等物

太祖登極之初琉球首先臣附太祖

深嘉忠貞榮賜如此

洪武二十二年己巳初遣子弟入監讀書

洪武初琉球為進貢事或三年一次或五年一

次遣使朝京有時遭颶風飄到麻古山太平

山彼二山見琉球進貢中國之事皆知事大之

義洪武二十三年庚午率其管屬北面稱臣

洪武二十五年壬申遣子侄入監讀書

皇帝命工部給羅絹為秋衣亦給鋪蓋從人給衣禮待甚厚矣

洪武二十五年壬申之冬又遣舅仁悅慈等入監讀書賞賜皆照例

洪武二十五年壬申為綱紀

太祖皇帝遣賜閩人三十六姓因而文風丕振以致一道同風之盛從此本國始節音樂不異中華太祖皇帝稱之曰守禮之邦今三十六姓凋謝僅存

者蔡鄭林梁金五家也。王後驕奢建造數十丈之高樓以備遊觀。一日登樓戲言曰：吾居此樓，雖毒蛇安敢害我也。其夜蛇來咬君之左手，其患處腫爛，終斷一手。近侍臣奏曰：人君無左手，何以行人君之大禮？願奉上一手，奏畢割其左手進上。王受臣手續療之，是故察度王之左手黑色生毛，不侔于全體也。其壽圖在末吉萬壽寺萬曆三十八年庚戌九月二十二

日因燒寺而失之也

二十八年乙亥十月初五日薨在位四十六年
壽七十五

武寧王

察度王世子也神名中之真物母勝連接司女
子妃世子不傳至正十六年丙申降誕

紀

洪武二十九年丙子即位

永樂二年甲申

皇帝封為中山王詔使並所賜物件皆不傳

本年命遣從子三五良璽等九人至

京奏請入監給賜一如洪武中故事令工部建王子書房於監前以處焉

世衰道微背父遺命內則好色外則怠政不辨群臣之賢否不顧兆姓之憂樂朝夕好遊玩獸諸按司皆叛後山南起義兵來攻中山王勢孤

力弱難以扞禦永樂三年乙酉出城伏罪在位
十年壽不傳

世譜卷之三

尚思紹王

父母妃降誕壽不傳神名君志真物世子尚巴
志王

附記

思紹原是為佐敷按司時遇分土爭雄民極塗
炭觀其子巴志有治亂之能于洪武三十五年
以佐敷傳之後巴志果與湯武之師救民于水

火之中征自山南及得中山奉其父思紹為主
而不敢自立即巴志之為人亦可觀而思紹之

為王蓋有是故也

按舊譜巴志既于洪武三十

按司及得山南中山而自立為王者蓋誤矣若
如此則思紹何以有受封之事于是推之其為
誤者明矣故

紀

永樂四年丙戌即位

本年遣寨官子石達魯等六人入監讀書其後

李傑石達魯每在監三年得乞歸省矣給賜皆

照前例

五年丁亥九月

皇帝封為中山王詔使並所錫物件皆不傳

按舊譜及琉球

錄內載宣德三年戊申思紹傑追封云今考宣

德二年五月二十四日賜尚巴志皮弁冠服時

禮部咨內載永樂五年九月內欽准襲封本國

中山王世子思紹爵給皮弁冠服等件等因在

案由是觀之思紹親受王爵而

非追封也明矣故改舊譜焉

九年辛卯四月遣使坤宜堪彌等貢馬及方物

本年遣王相之子懷得寨官之子祖魯古入監讀書給賜如舊例

十一年癸巳遣寨官之子周魯每等三人入監讀書是年有奏歸省者

皇帝命禮部厚賜以榮其歸是後乞歸省或令候其使臣還國以行永樂以後至于正德嘗三四遣至焉

十八年庚子爲交鄰國事遣使者佳期巴那通

事梁復到暹羅國從此時爲交隣通於暹羅朝
鮮蘇門荅刺國滿刺加國爪哇等國
永樂中國王嗣立皆請

命冊封朝貢以時然歷年已久無案可考不敢強
記

十九年辛丑薨在位十六年壽不傳

尚巴志王

尚思紹王世子也母不傳洪武五年壬子降誕

妃不傳神名勢治高真物世子尚忠洪武三十
五年壬午歲三十一嗣父思紹爲佐敷按司

附記

巴志爲人身體極小長不滿五尺故俗號曰佐
敷小按司素有矢志幼年時往遊與那原令鉄
匠造劍鉄匠急造農器不遽造劍小按司屢往
問要鉄匠不得脫話暫練其鉄詭爲造劍之狀
小按司還則止而不造漸漸練鉄三年而成劍

小按司持此劍乘船遊戲偶海中大魚飄來將
吞小按司見其所持之劍退畏不敢侵此時異
國人駕四五隻船裝載鉄塊至與那原商賣其
賣鉄人竒其劍以鉄塊欲易之小按司不肯換
終以數艘所載之鉄換而去小按司得此鉄散
給百姓令造農器百姓感服大獲民心後小按
司有金圍屏島尻大里按司欲其圍屏竟以金
圍屏換于嘉多志川小按司得此禁水歸已者

與水不歸己者不許用其水大里百姓無水不能種田多歸于小按司時山南王暴虐無道心志驕敖不思民苦堪樂飲酒諸按司皆叛山南王大怒發兵攻之所叛之諸按司皆歸于小按司山南王怒曰今小按司與諸按司同謀倡亂其罪當征即發兵來伐諸按司皆助小按司伐山南王小按司得山南普施民利中山山北之民多歸于山南兵勢日強遂伐武寧得中山立

父思紹為王

舊譜自立為中山王者悞也

後山北王管轄之

地漸次歸于中山時羽地按司捷報來告曰山

北王整頓兵馬將伐中山請先事動兵若遲悞

則悔之無及矣中山急命浦添按司越來按司

讀谷山按司名護按司羽地按司國頭按司等

令率大兵攻之永樂二十年壬寅三月十一日

起程三月十三日至山北即四面圍繞山北王

勇力剛強之人兼之防備甚密固守城池兩邊

對敵晝夜四日攻戰山北大敗北軍死者不計其數然後山北王知盡力窮拔刀斬斷盤石自刎其所執之刀拋于重間河而死從此琉球歸一統致太平治也

紀

永樂二十年壬寅即位

此時始賜尚姓吾朝請封王爵之例從此始
洪熙元年乙巳

皇帝遣內官柴山

封爲中山王且

諭祭先王尚思紹其勅曰

皇帝勅諭琉球國中山王世子尚巴志昔我

皇考太宗文皇帝恭膺

天命統御萬方恩施一視遠邇歸仁爾父琉球中山

王思紹聰明賢達茂篤忠誠敬

天事上益久弗懈朝貢有常罔愆于職我

皇考嘉乃勤款良用褒錫肆朕纘承大統弘敷治化
尤重繼承念尔父告終已逾再歲非有嗣嫡之
賢曷膺傳襲之重茲特遣内官柴山齋勅命尔
世子尚巴志爲琉球國中山王以繼其世於戲
尚立忠立孝恪守藩服脩德務善以福一國之
人則爵祿之榮延于無窮尚其祇承朕命無怠
無忽故茲勅諭宜體至懷
本年閏七月十七日爲謝

恩事遣長史鄭義才使者實達魯等奉

表赴

京

本國遣使者謝恩之例從此而始所獻之物在案

宣德元年丙午三月十一日為慶賀

登極事遣使者佳期巴那等赴

京進獻方物所獻之物在案

本年又為進

貢事遣使者阿蒲察都等齎捧

表文進獻方物所貢之物在案

本年六月初一日

皇帝遣內官柴山前來

勅賜皮弁冠服賜妃以綵幣等物其物件在案其勅

曰

皇帝勅諭琉球國中山王尚巴志今遣內官柴山前來賜尔皮弁冠服并齋銅錢收買生漆及各色磨刀石勅至尔即領價收買交付內官柴山進

來故諭 又賜中山二大字匾額

昔察度王武寧王時進貢三年一次或四年一次或五六年一次未有定期從此定三年二貢之例

正統四年己未四月二十日薨在位十八年壽六十八

尚忠王

尚巴志王第二王子也母妃不傳洪武二十四

年辛未降誕年三十二歲爲今歸仁王子世子
尚思達

紀

正統五年庚申即位

六年辛酉七月初六日爲進

貢事遣長史梁求保使者揚布明泰等捧

表文進獻方物所貢之物在案

本年爲慶賀

萬壽聖節事遣使者達福期等捧表文進獻方物
八年癸亥

皇帝遣正使給事中俞忭副使行人劉孫

封為中山王且

諭祭先王尚巴志

頒賜國王王妃照先代之例

九年甲子十月二十四日薨在位五年壽五十

四

尚思達王

尚忠王世子也母妃不傳神名君曰永樂六年
戊子降誕無世子令叔父尚金福繼世

紀

正統十年乙丑即位

十三年戊辰

皇帝遣正使給事中陳傅副使行人萬祥

封為中山王且

諭祭先王尚忠

頒賜國王王妃照先代之例

本年爲謝

恩事遣王舅馬權度等官齎捧

表文進獻方物進

京謝

恩所獻之物在案此時尚金福亦附搭進獻方物王
舅馬權度回國時

皇帝思賜國王及王叔尚金福以綵幣等物所賜之
物件在案正統十四年己巳九月十六日賜
勅諭其勅曰

皇帝勅諭琉球國中山王尚思達

朕奉

天命祇承

祖宗大位主宰生靈夙夜惓惓懼欲天下之人咸得
其所惟王遠居海外能敬順

天道恭事朝廷恪脩職貢遣舅馬權度等奉表并王叔尚金福俱以馬匹金銀器皿等方物來貢益見誠意朕甚嘉悅今權度等回特賜王王妃并王叔綵幣王其體朕至懷故諭十四年己巳之秋爲進

貢事遣亞間美等官捧

表文進獻方物所貢之物在案

本年十月十三日薨在位五年壽四十二

尚金福王

尚巴志王第六王子也母妃不傳神名君志洪武三十一年戊寅降誕世子尚泰父王

紀

景泰元年庚午即位

二年辛未夏前年所遣使者亞間美等官回國因之

皇帝賜勅及綵幣等物所賜之物件在案景泰元年

庚午閏正月初八日賜勅其勅諭曰

皇帝勅諭琉球國中山王尚思達

國家一視同仁無間遠邇况於謹脩職貢之國
尤所當厚爾琉球於中國為東蕃世脩職貢逾
久益勤今王遣使亞間美等奉表及進方物禮
意勤至朕承

列聖嗣登大寶期與四海同樂雍熙王能篤於事大
良足嘉尚使還特賜王及妃綵幣以答誠意王

其欽崇

天道仁卹生民永固藩屏以副朕懷故諭

三年壬申

皇帝遣正使給事中陳謨副使行人董守宏

封爲中山王且

諭祭先王尚思達

頒賜國王王妃照先代之例

四年癸酉四月十八日薨在位四年壽五十六

尚泰久王

尚金福王世子也大世主母妃不傳神名那之
志與茂伊永樂十三年乙未降誕宣德十年乙
卯爲越來王子世子尚德王

紀

景泰五年甲戌即位

七年丙子

皇帝遣正使給事中李秉彛副使行人劉儉

封爲中山王且

諭祭先王尚金福

頒賜國王王妃照先代之例

有勝連按司阿摩和利者素有無君之心將有
謀叛然護佐丸居于中城要路不能施其奸謀
故讒護佐丸於王王隨命阿摩和利伐之阿摩
和利從此得意將叛其夫人踏揚按司之僕從
有鬼大城預知其謀叛窺人跡靜負夫人逃走

三更時到王城敲門報王王命鬼大城率兵討之鬼大城伐阿摩和利有功其日神出現賀國家太平

在位中鑄諸寺諸院鐘

其鐘今已存之

天順四年庚辰六月初五日薨在位七年壽四十六

尚德王

尚泰久王第三之王子世高王也神名八幡之

按司母妃不傳正統六年辛酉降誕世子王薨
時逃難于真玉城兵卒追殺之後其屍甚靈驗
島屍真壁人民來盜其屍一時不及盡取遺其
一腓藏其所遺之一腓處今謂腓城尚德王世
子屍也

紀

天順五年辛巳即位

七年癸未

皇帝遣正使給事中潘榮副使行人蔡哲
封爲中山王且

諭祭先王尚泰久

頒賜國王王妃照先代之例

本年八月初四日爲謝

恩事遣王舅王察都長史梁賓等官齎捧

表文進獻方物所獻之物在案

成化元年乙酉爲慶賀

登極事遣王弟尚武長史蔡璟等官齎捧

表文進獻方物所獻之物在案

本年爲進

貢事遣正議大夫程鵬長史梁賓等官齎捧

表文進獻方物所獻之物在案

鬼界島叛數年不朝屢攻無功原來

尚德王素性勇剛怒曰前遣將伐小島非但無功
反見侮辱吾今欲親領兵至于彼地以除賊亂

于是親率二千餘騎乘大船五十艘成化二年
丙戌二月二十五日那霸開洋同二十八日至
于鬼界島攻戰數日逆賊被官軍圍繞無計可
施皆出寨請降于是誅賊首同三月十一日彼
島開船十三日歸朝其後尚德王驕心日甚
擅殺無辜在朝良臣屢諫不納良臣退隱山林
者不可勝計成化五年己丑四月二十二日薨
在位九年壽二十九時國相將立幼稚之世子

國人皆不從遂廢世子立內間里主御鎖側爲
君是爲尚圓王

世譜卷之四

尚稷王

父母降誕薨壽俱不傳妃瑞雲世子尚圓王次男尚宣威王原是葉壁山伊是名首見人也康熙三十八年己卯二月初七日以爲王父奉祀于國廟

尚圓王

尚稷王世子也童名思德金神名金九按司添

未續之王仁子母瑞雲妃月光永樂十三年乙未降誕世子尚真王次聞得大君加那志

附記

尚圓王生于葉壁山生而有賢德及其長以農爲業或時天旱民田皆涸金丸田自有水盈滿人皆疑爲盜水將害之常不和睦金丸不能安其身正統三年戊午年二十四歲携妻弟渡海至于國頭居處二三年亦不見容勢孤不能自

強盡心待之終不得免。侵凌因茲。正統六年辛酉始到首里托身于。越來王子尚泰久尚泰久見其居動知非常人。即薦于尚思達王始爲家來赤頭勤職數年。同僚敬信。景泰三年壬申陞黃冠。後尚泰久即位。景泰五年甲戌爲內間。頌主一年間。內間民愛戴漸次。善名振世。天順三年己卯。陞御物城御鎖側。其仁德自彰。就之如日望之。如西敬以事君。信以使人。其賞罰當理。

不但那霸四邑蒙其惠雖海外小島莫不感懷
尚泰久信之有素凡有政事召御鎖側相議王
薨世子尚德立資質敏捷才力過人知謀自用
不納人諫巧言自誇以飾其非擅殺良民御鎖
側進諫曰臣聞明君持己以恭使民以仁故享
永安之福請洗心易行伏于君前尚德大怒曰
順我者賞違我者罰汝安能妄諫我耶遂入內
殿成化之初尚德王幸于久高島返駕至于與

那原時隨駕者饑不賜酒食急欲還駕御鎖側
諫曰先王深念群臣之饑勞爲此備酒食賞給
至今相傳爲例請暫停龍駕以解臣民之饑曳
裾進諫于是暫停龍駕賞給酒食尚德王暴虐
日甚御鎖側屢諫不聽成化四年戊子八月初
九日退隱于內間地方成化五年己丑四月二
十二日王薨壽二十九當時法司欲立幼推世
子招集群臣割牛耳群臣心皆不從然畏法司

權勢但默而不敢言有一人挺身而出觀其人
鶴髮老翁德器儼然正襟從容高聲言曰先王
尚德暴虐無道不念先祖之勤苦不顧臣民之
艱難今幸自賊則廢世子立御鎖側國家之福
也言畢則滿朝群臣齊聲允諾其聲如雷時貴
族近臣爭先逃走王妃乳母欲救世子性命擁
抱而逃隱于真玉城兵卒追而弑之其日群臣
相議以鳳輦龍衣至于內間迎接御鎖側大驚

曰惡是何言也爾等急歸首里擇貴族中可立
爲君固辭避于內間高岸群臣追從力請尚圓
王不得辭脫服着龍衣而至首里即位至今相

傳有脫衣岩

俗曰脫
御衣瀨

紀

成化六年庚寅即位

即位之翌月神出現命名曰金丸按司添末續
王仁子尚圓王即位以來以寬治民除其虐政

博施仁政于是先朝遁隱之臣歡欣來歸尚圓王因才而使之故治化大行父與父言慈子與子言孝以致一道同風之盛也

本年九月七日尚圓爲尚德王之世子遣使於大明請

襲封其時使臣長史蔡璟使者吳司馬益周間宋璧通事梁應等進獻方物所獻之物件開列在案八年壬辰

皇帝遣正使給事中官榮副使行人韓文

封爲中山王且

諭祭先王尚德

頒賜國王王妃照先代之例其物件在案其勅曰

皇帝勅諭琉球國故中山王尚德世子尚圓惟尔克
世撫有海邦臣事

皇明克篤忠敬乃父尚德紹襲王封曾未數年遽焉
薨逝尔爲冢嗣式克象賢宜承爵命統其國人

茲特遣正使給事中官榮副使行人韓文齋
詔封尔爲琉球國中山王并賜尔及妃冠服綵幣等
物尔宜永堅臣節益順

天心常懷事大之誠用廣承先之志欽哉故諭成化

七年辛卯七月初八日

八年九月二十八日爲謝

恩事遣王舅武實長史李榮使者明泰等官賫捧

表箋方物赴

京謝

恩所獻之物開列在案

九年九月初三日爲進

貢等事遣使者闍那益沙美倪始等官齎捧

表文進獻方物所貢之方物開列在案貢期三年
兩次

十二年丙申七月二十八日薨在位七年壽六
十二葬于見上森陵後葬于玉陵其世子久米

中城王子雖當立然年幼冲閱歷未深群臣相
議暫時以王弟越來王子爲主君

尚宣威王

尚稷王第二王子也童名不傳神名西之世主
母瑞雲宣德五年庚戌降誕五歲父母見背隨
兄生長九歲到此地景泰四年癸酉年二十四
歲陞家來赤頭天順七年癸未年三十四歲陞
于黃冠成化六年庚寅年四十一歲陞于越來

王子妃不傳

紀

成化十三年丁酉即位

即位之年二月陽神君手摩出見尚宣威意中
爲已作賀而喜色滿面自上于王座其時久未
中城王子立于王座之側古來君君神神出自
內殿至于奉神門後東面而立此番皆西面而
立在朝之臣皆恐驚有暫時神有宣訖神訖之

昔皆有指久米中城王子爲君尚宣威聞訖言
始識尚真王爲命世之真主且言曰我無其命
居于君位恐有戾于天在位六箇月退君位以
久米中城王子爲主君是爲尚真王尚宣威退
位隱居于越來其年八月四日薨葬不傳壽四
十八在位六箇月其後裔今越來朝略是也

尚真王

尚圓王世子也童名真加戸樽金神名於義也

嘉茂慧加那志母月光成化元年乙酉降誕妃

尚宣威王女也童名號俱不傳有二夫人謝氏

思戶金按司號華后茗列子女童名號俱不傳

有七男一女長子曰尚維衡正妃所生次曰佐司笠

按司加那志茗列子女之所生次曰尚朝榮母不傳次曰

尚清王華后所生次曰尚韶威次曰尚龍德次曰尚

亨仁次曰尚源道俱母不傳

紀

成化十三年丁酉即位

生質甚明謙己受益能繼先志善述父業治道
大明政刑咸備以致隆平之治

本年八月二十日為請

襲封王爵等事遣長史梁應等官捧

表奏進獻方物所獻之物件開列在案

十五年己亥

皇帝遣正使董旻副使張祥

封爲中山王且

諭祭先王尚圓更

恩賜忠順可嘉四字匾額

頒賜國王王妃照先代之例其物件在案

本年九月二十六日爲謝

恩等事遣王舅馬怡世正議大夫程鵬長史蔡曦等

官捧

表文赴

京謝

恩所獻之物在案

十七年辛丑八月十二日爲進

貢事遣正議大夫梁應長史蔡曦使者泰那等官

齎捧

表文進獻方物所貢之方物開列在案貢期三年

兩次

本年又遣官生蔡賓等五員入監讀書

弘治二年己酉九月十二日爲慶賀

登極事遣王舅麻勃都正議大夫梁德等官捧

表文赴

京進獻方物所獻之物在案

本年又爲進

憲宗皇帝香品事遣使者馬仁通事蔡實齋捧香一

炷重五十斤赴

京進香

琉球國管轄之嶋名曰宮古次曰八重山每歲
納貢當此二三年間八重山嶋變心謀叛將攻
大宮古此事傳聞于首里

國王急命大里親雲上等九員爲將撥軍船大小
四十六艘弘治十三年庚申二月二日那霸開
洋十三日到八重山石垣十九日欲見其地界
陣勢乘小船上岸見之其陣前向大海後倚嶮
岨其地之婦女皆持草木之枝號天呼地咒罵

官軍雖乘船上岸略無畏懼賊首掘川原赤蜂
首出搦戰我兵近崖彼此相罵此日兩邊不戰
者各忌惡日故引軍而退二十日甲辰四十六
艘之舟分爲兩隊一隊攻登野城一隊攻新河
于彼地兩邊相戰終官軍得勝奏凱而歸
十四年辛酉九月玉陵造成

正德元年丙寅九月初二日爲慶賀

登極事遣王舅亞嘉尼施長史蔡賓等官捧

表進獻方物所獻之物開列在案

嘉靖二年癸未八月十七日遣官生蔡廷美鄭富梁梓蔡浩入監讀書

五年丙戌十二月十一日薨葬于玉陵在位五十年壽六十二

尚清王

尚真王第三王子也童名真仁堯樽金神名天續之按司添加那志母謝氏思戶金按司號華

后弘治十年丁巳降誕妃毛氏思真錢金按司
加那志號月江有二夫人魏氏城之大按司志

良禮童名真鶴金號瑞室樂氏大按司志良禮

童名真美那古金號后德有二妻真世仁金號

禮室與那原阿吳母志良禮號不傳有十男二

女長子曰尚禎后德所生次曰尚元王月江所生次曰尚

揚叢次曰尚鑑心次曰阿應理屋惠按司加那

志次曰尚桓次曰尚范國俱母不傳次曰尚宗賢瑞室

所生次曰尚洪德禮室次曰尚龔禮次曰首里大
君按司加那志俱母次曰尚悅與那原阿吳母
不傳志良禮所生

紀

嘉靖六年丁亥即位

常存心于國家加志于窮民一民饑曰我饑之
也一人寒曰我寒之也仁照而義立

八年己丑八月十五日為進

貢等事遣長史蔡翰使者馬吾刺等官齎捧

表文進獻方物所貢之物在案貢期三年兩次

十年辛卯八月十二日為請

襲封王爵事遣正議大夫金良長史蔡瀚等官捧

表奏進獻方物所獻之物件開列在案

十三年甲午

皇帝遣正使陳侃副使高澄

封為中山王且

諭祭先王尚真

頒賜國王王妃照先代之例

十四年乙未二月初八日爲謝

恩等事遣王舅毛實長史蔡瀚等官捧
表文進獻方物所獻之物開列在案

大島謀反絕貢不朝 王怒曰孤當親去征討
群臣議奏曰大島雖有叛心奈航海險阻只可
遣將伐之何必勞聖駕矣 王曰不然彼島離
國甚遠人多不習風化倘不親征何以收伏逆

賊之心耶于是修備戰船五十餘艘親統大軍
嘉靖十六年丁酉二月十三日那霸開洋前在
運天港口候風本月十六日遂臨大島進發十
八日齊到名勢港口金鼓震天勢如天神逆徒
大驚略無戰心引頸伏罪所謂仁者無敵于此
不見哉王入其邑撫安百姓制法定度乃諭邑
長曰汝再有不臣之心決不輕赦邑長百拜受
命百姓叩頭欣呼因此本年三月乃要班師還

國王忽淹疾醫藥無效群臣驚懼法司國頭馬
思良曰今王遠涉險阻親征外夷倘有不諱逆
徒必生異心禍不輕矣我當代王告死即日沐
浴齋戒拜告于天神海神曰今王遇疾臣愿以
身代死祈罷王遂愈起群臣大喜便能班師奏
凱四月中旬歸到那霸庶民拜迎百官喜賀從
此國家大治矣本年七月思良病卒王痛哭不
止乃嘆曰生我者父母也成我者思良也遂令

以厚禮葬之矣

十六年丁酉八月二十日爲進

貢慶賀

正位東宮等事遣正議大夫陳賦長史蔡廷美等官

齎捧

表箋進獻方物所貢之物開列在案

大美殿 尚清王始建之也王爲世子時遠在中城故造一宮于首里以爲問安之便焉及王

即位乃諭曰自古禁中時有天神海神而出現
真訖遊清潔之地也若子女降生及喪服等事
許行于此豈無穢汚神靈且春秋二時夫人女
子及宮女等出在菩提寺致祭多不便焉故倍
舊宮修造三殿則不但能免其穢汚亦當春秋
二祭行于此殿而各得其宜矣于是嘉靖二十
六年丁未八月起工至越年十二月告成王大
喜名曰大美殿乃有遺詔曰子孫勿改此制是

孤願也。因此至今宮殿翩翩永垂其制於戲王之盛意不啻敬神亦累禮大矣。

三十四年乙卯六月二十五日薨葬于玉陵在位二十九年壽五十九

尚元王

尚清王第二王子也。童名不傳。神名曰始。按司添加那志母毛氏思真。錢金按司加那志。號月江嘉靖七年戊子降誕。妃真和志。聞得大君加

那志號梅岳有二夫人久米具志川大按司志

良禮童名真鍋樽金號雪嶺毛氏前東之按司

童名真鍋樽金號梅嶺有三男一女長子曰尚

康伯雪嶺所生次曰尚永王次曰首里大君按司加

那志梅岳所生次曰尚久王梅嶺所生

紀

嘉靖三十五年丙辰即位

其德溫厚仁愛群生不愆不忘常以舊章為遵

依

三十六年丁巳二月初九日為請

襲封王爵等事遣長史蔡朝器使者尹德美等官捧

表文進獻方物赴

京所獻之物在案

本年又為進

貢等事遣正議大夫蔡廷會長史蔡朝器等官捧

表文進獻方物所貢之物在案貢期三年兩次

四十年辛酉

皇帝遣正使郭汝霖副使李際春

封爲中山王且

諭祭先王尚清

頒賜國王王妃照先代之例

本年九月十三日爲謝

恩等事遣王舅源德長史蔡朝噐等官齎捧

表文進獻方物所獻之物在案

四十四年乙丑二月二十二日遣官生梁炤蔡
爍梁焮鄭迴入監讀書

隆慶二年戊辰二月二十三日為慶賀

登極事遣王舅翁壽祥正議大夫梁炫等官齋捧
表文進獻方物所獻之物在案

本年又為進

世宗肅皇帝香品等事遣使者宗善齋捧香一炷重

三十五勛赴

京進香

三年己巳二月十五日為進

貢及慶賀

東宮正位事遣王舅毛廉長史蔡朝噐等官捧

表箋上

京進獻方物所獻之物在案

六年壬申四月一日薨葬于玉陵在位十七年

壽四十五

尚永王

尚元王第二王子也童名不傳神名英祖仁耶
添按司添加那志母真和志聞得大君加那志
號梅岳降誕不傳妃尚氏島屍佐司笠按司加
那志童名真滿金號坤功有二夫人金氏前之
東按司童名真鍋樽金號慈山葛氏西之按司
號梅月有二女長女曰阿應理屋惠按司加那
志次曰聞得大君加那志

俱坤功
所生

因無男子而

讓位于尚真王之長子尚維衡曾孫尚寧也

紀

萬曆元年癸酉即位

本年二月二十四日爲進

貢等事遣使者馬納里通事鄭禧等官齎捧

表文進獻方物所貢之物在案貢期三年兩次

二年甲戌二月二十日爲慶賀

登極等事遣王舅馬忠叟長史鄭祐使者馬南庇等

官齋捧

表文進獻方物所獻之物在案

本年又為進

穆宗莊皇帝香品等事遣使者毛有倫齋捧香一炷
重三十五觔赴

京進香

本年閏十二月初三日為進

貢請

封船隻未還本國探問事遣使者馬慶通事鄭禧等
官齋捧咨文到閩

三年乙亥十二月二十一日為請

襲封王爵等事遣長史梁燦使者衛榮等官齋捧
表文進獻方物所獻之物在案

七年己卯

皇帝遣正使蕭宗業副使謝杰

封為中山王且

諭祭先王尚元

頒賜國王及王妃照先代之例

本年十二月十一日為進

貢謝

恩事遣王舅馬良弼長史鄭迴使者馬勝步等官捧
表文進獻方物所獻之物在案

本年又為照例起送官生鄭週蔡常鄭迪入監
讀書

十六年戊子十一月二十五日薨葬于玉碯在
位十六年壽不傳

尚懿王

浦添王子尚弘業長子也童名思太郎金俗稱
與那城王子母豐見城大按司志郎禮童名思
乙金號慈光降誕薨葬俱不傳妃尚氏首里大
君按司加那志號一枝

康熙三十八年己卯二月初七日以為王父奉

祀于國廟

世譜卷之五

尚寧王

尚懿王世子也童名思德金神名日賀末按司
添加那志母尚氏首里大君按司加那志號一
枝嘉靖四十三年甲子降誕萬曆年間為浦添
王子妃尚氏阿應理屋惠按司加那志童名真
錢金號蘭叢有二夫人傳氏西之按司童名真
錫樽金號西月章氏安谷屋大按司志良禮童

名真錫樽金號涼月因無世子而讓位于尚永
王親弟尚久王第四王子尚豐王也

紀

萬曆十七年己丑即位

本年三月十一日為進

貢等事遣正議大夫梁應長史鄭週使者鄔賓等

官齎捧

表文進獻方物所貢之方物開列在案貢期三年

兩次

二十八年庚子八月十九日為請

襲封王爵等事遣長史蔡奎使者毛如鳳等官齎捧

表文赴

京進獻方物所獻之物在案

萬曆三十四年丙午

皇帝遣正使夏子陽副使王士禎

封為中山王且

諭祭先王尚永

頒賜國王王妃

詔書物件皆無案

本年十月十八日為謝

恩事遣王舅毛鳳儀正議大夫鄭道使者芝巴那等

官賣捧

表箋方物赴

京謝

恩所獻之物開列在案

三十五年丁未九月二十八日

王憂三十六姓久居本國子孫凋殘即遣使

題請阮國毛國鬲蓋本國唐榮中阮毛二姓始于

此

四十一年癸丑五月十三日福建布政司奉

聖旨達洛其洛內補琉球新經殘破財匱人乏何必

間關遠來還當厚自繕聚俟十年之後物力稍

完然後復修貢職未為晚也于此時定貢期十年一次

泰昌元年庚申九月十九日薨在位三十二年壽五十七

尚久王

尚元王第三王子也童名真三即金母毛氏前之東按司童名真鍋樽金號梅嶺嘉靖三十九年庚申十月十八日降誕妃寵氏金武大按司

志良禮童名思戶金號一鏡有二妻豐見城間
切西原村平良掟女童名真嘉戶樽號寒月美
里間切大里村中村渠掟親雲上女內間阿摩
衆武志良禮童名真鍋樽號本光有九男五女
長子曰尚憲次曰德林次曰本覺次曰尚寬次
曰尚定次曰尚豐王次曰慈室次曰利啻次曰
尚盛次曰尚漚俱一鏡所生次曰尚亨次曰金是寶
俱寒月次曰雪岩次曰尚全矩俱本光所生

泰昌元年庚申三月十五日薨壽六十一
康熙三十八年己卯二月初七日以爲王父奉
祀于國廟

尚豐王

尚久王第四王子也童名思五郎金神名天喜
也末按司添加那志母寵氏金武大按司志良
禮童名思戶金號一鏡萬曆十八年庚寅十一
月十三日降誕妃先娶尚氏我謝上森按司加

那志童名真錢金號梅岩次娶馬氏君豐見按
 司加那志童名真牛金號蘭閨有三夫人松氏
 西之按司加那志童名真鍋樽金號涼月吳氏
 真南風按司童名乙美金號蘭室樂氏真南風
 按司童名真鍋樽金號南岳妻與那原阿護母
 志良禮號苑叢有四男四女長子曰尚恭次曰
 首里大君按司加那志次曰尚文俱梅岩次曰
 尚賢王次曰澤岬翁主俱涼月次曰佐司笠按
所生

司加那志南岳所生次曰尚質王涼月所生次曰與那城

翁主南岳所生

附紀

萬曆年間領佐敷

四十四年丙辰任攝政

本年領知行高千斛

四十七年己未領中城

紀

天啓元年辛酉即位

率由舊章能修善政資質甚敏深識諸藝之蘊
始製陶器足國器用時百姓和睦風俗端慤
本年爲進

貢請

封事遣王舅毛鳳儀正議大夫蔡堅等進

京請

封外乞請

貢期二年壬戌定五年一貢之例

三年癸亥正月十八日爲慶賀

登極事遣王舅馬勝連長史林國用等官齎捧

表文方物赴

京獻賀所獻

皇帝並

中宮之物開列在案

本年閏十月十六日爲進

貢等事遣正議大夫鄭俊使者金城宰都通事鄭

子庶等官齋捧

表文進獻方物所貢之物開列在案

四年甲子秋福州中衛指揮同知蕭崇基齋捧

登極大婚

詔書臨本國五年乙丑春事竣回國

五年乙丑二月十九日為請

襲封王爵事遣正議大夫蔡厘使者毛鳳威等官齋

捧

表文赴

京進獻方物所獻之物開列在案

崇禎元年戊辰秋指揮閔邦基齎捧

詔書臨本國二年己巳四月間事竣歸國

二年己巳正月二十九日為慶賀

登極併進

熹宗愍皇帝香品事遣王舅毛泰時長史蔡錦等官

所獻之禮物在案

四年辛未三月十六日爲慶

賀事遣王舅毛時耀正議大夫鄭子孝齋捧
表文赴

京進獻方物所獻之物在案

五年壬申四月二十二日爲進

神宗顯皇帝並

光宗皇帝香品事遣使者英梓等官齋捧

表文赴

京進香

六年癸酉

皇帝遣正使杜三策副使楊掄

封爲中山王且

諭祭先王尚寧

頒賜國王王妃照先代之例

本年十月十五日爲謝

恩事遣王舅吳鶴齡紫金大夫蔡堅使者栢壽都通
事阮士乾等官齎捧

表箋進獻方物所進之物開列在案

七年甲戌禮部奉

旨達咨定貢期三年兩貢

十三年庚辰五月初四日薨在位二十年壽五
十一葬于玉陵

尚賢王

尚豐王第三王子也童名思松金母松氏西之
按司加那志童名真鍋樽金號涼月天啓五年
乙丑九月十五日降誕妃向氏玉寄按司加那
志童名真加戸樽金號花園妻毛氏真壁阿護
母志良禮童名真加戸樽金因無世子而讓位
親弟尚質王

附紀

崇禎年間領久米中城並知行高五百斛年月

不傳

紀

崇禎十四年辛巳即位

十五年壬午三月初七日為進

貢事遣正議大夫蔡錦使者翁鎮等齎捧

表箋進獻方物所貢之方物開列在案貢期三年

兩次

順治二年乙酉正月十九日

弘光遣福州左衛指揮花燧以

登極事詔告本國本年四月二十五日歸國

三年丙戌正月二十一日

隆武遣指揮閔邦基以

登極事詔告本國四月十八日歸國

本年三月初九日為慶賀

隆武定位事遣王舅毛泰久長史金思義抵閩事竣

將回時大清將軍貝勒率大兵至閩攻破

隆武福建亦歸順

清朝故毛泰久等從貝勒赴

京各自投誠即隨招撫使謝必振回國招撫事見

于後

四年丁亥九月二十二日薨葬于玉陵在位七
年壽二十三

尚質王

尚豐王第四王子也童名思德金母松氏西之

按司加那志童名真鍋樽金號涼月崇禎二年
己巳八月十五日降誕妃向氏美里按司加那
志童名真松金號栢窓夫人東氏真南風按司
童名思戶金有三妻章氏安谷屋阿護母志良
禮童名思戶金號本光駱氏宮城阿護母志良
禮童名真鍋樽金號惠室諸見里阿護母志良
禮童名真牛金號月嶺有七男五女長子曰尚
貞王次曰尚弘毅次曰尚弘仁

俱美里按司
加那志所生
次

曰尚弘才真南風按次曰安谷屋翁主號玉蓮

美里按司加次曰諸見里翁主諸見里阿護母

那志所生次曰與那嶺翁主志良禮所生

次曰尚弘德宮城阿護母次曰與那嶺翁主安

屋阿護母志次曰大嶺翁主真南風按次曰尚

良禮所生次曰大嶺翁主司所生次曰尚

弘信安谷屋阿護母次曰宮平翁主真南風按

次曰尚弘善安谷屋阿護母

志良禮所生

附紀

崇禎十四年辛巳領佐敷並知行高三百斛

十五年壬午九月十二日加領知行高二百斛
順治二年乙酉轉領中城

紀

順治五年戊子即位

即位以後修德行仁所行之政皆由

先王之舊規當時臣民含哺鼓腹

六年己丑九月十三日

皇帝遣謝必振賚捧

詔書並欽賞物件招撫本國事竣回國時遣都通事
梁廷翰等護送至閩謝必振即帶在驛通事周
國盛進

京投誠

九年壬辰八月三日

皇帝遣謝必振討還明印於癸巳三月二十一日回
京交納

十年癸巳二月二十七日爲慶賀

登極事遣王舅馬宗毅正議大夫蔡祚隆等官捧

表獻方物赴

京交納所獻物件在案

十七年庚子九月二十七日

王城回祿

康熙二年癸卯六月二十七日

皇帝遣正使張學禮副使王垓

封為中山王

此時王城未嘗造成於大且美御殿待天使受封

諭祭先王尚豐

頒賜國王王妃照先代之例其物件在案其勅曰

皇帝勅諭琉球國世子尚質爾國慕思向化遣使入

貢

世祖章皇帝嘉乃抒誠特頒恩賚命正使兵科副理
官張學禮副使行人司行人王垓齎捧勅印封
爾爲琉球國中山王乃海道未通滯閩多年致
爾使人物故甚多及學禮等奉制手回京之日

又不將前情奏明該地方督撫諸臣亦不行奏
請迨朕屢旨詰問方悉此情朕念爾國傾心修
貢宜加優卹乃使臣及地方各官逗留遲誤豈
朕柔遠之意今已將正副使督撫等官分別處
治特頒使臣恩賚此前加倍仍將正使張學禮
副使王垓令其自贖前罪暫還原職著速送使
人歸還本國一應勅封事宜仍照

世祖章皇帝前旨行朕恐爾國未悉朕意故再降勅

諭俾尔聞知。尔其益殫厥誠。毋替朕命。欽哉。故
諭康熙元年十月二十八日

二年癸卯十一月二十日為謝

恩事遣王舅吳國用紫金大夫金正春等官費捧
表文赴

京謝

恩所獻之物在案

欽賞國王緞疋二十疋在案。賞緞疋之例始于斯

三年甲辰二月十五日爲慶賀

登極並進

世祖章皇帝香品事遣王舅英常春正議大夫林有

才等官齎捧

表文進

京進獻方物所獻之物在案

欽賞物件使者帶回開列在案

五年丙午二月初九日爲進

貢事遣正議大夫鄭思善使者毛榮清等官所貢

物件在案

此時外貢紅銅六百觔黑漆龍
画螺盤十個外貢從茲始矣

欽賞國王物件在案貢期三年兩次

七年戊申為進

貢事遣耳目官吳文顯

遣耳目官
例從茲始

正議大夫王明

佐齋捧

表文赴

京進獻常貢外貢方物其物件在案

皇帝賜勅一道

從此以後每貢思賜勅諭

欽賞國王物件亦在案

此時外貢方物數內除去黑漆龍画盤十個另特加進黑

鐘一百個

本年十一月十七日薨葬于玉陵在位二十一

年壽四十

尚貞王

尚質王世子也童名思五郎金母向氏美里按

司加那志童名真松金號栢窓順治二年乙酉

十二月初六日降誕妃章氏聞得大君加那志
童名真鶴金夫人方氏真南風按司童名真加
戶樽金妻馬氏武富阿護母志良禮童名思戶
金世子曰尚純公次曰尚經
尚綱次曰國場翁主次曰思真鶴金翁主次曰
尚紀次曰內間翁主次曰識名翁主次曰安室

翁主

俱真南風
按司所生

附紀

聞得大君加
那志所生

次曰

順治七年庚寅六月二十五日領中城並領知行高五百斛

康熙元年壬寅七月二十八日加領知行高一千斛

紀

康熙八年己酉即位

九年庚戌十月十三日爲進

貢事遣耳目官富茂昌正議大夫蔡國器等齎捧

表文赴

京進

貢及外貢物件開列在案

欽賞緞疋二十疋貢期三年兩次

十年辛亥二月二十五日王殿告竣

王始移于王殿

十三年甲寅

靖南王謀叛因此十二年癸丑貢使耳目官吳美

德正議大夫蔡彬等無歸路滯于蘓州數年其
間本國不敢入貢到十六年丁巳特遣正議大
夫蔡國噐等探問清朝消息并貢使安否

皇帝大悅深嘉其忠貞十九年加賞緞疋

十七年戊午十月二十八日爲進

貢事遣耳目官陸承恩正議大夫王明佐等官捧
表赴

京時准

國王請接貢船疏接貢船從此而始

十九年庚申為進

貢請

封事遣耳目官毛見龍正議大夫梁邦翰等官賫捧

表文赴

京時加

欽賞緞疋二十疋共為四十疋此時恩免馬十疋後

更進紅銅三千觔

此
時
免
系
烟
乙
百
匣
蚶
螺
茶
鍾
乙
百
個

二十一年壬戌十一月

皇上恩免外貢方物圍屏紙一萬張磨刀石一百塊
蕉布一百疋

二十二年癸亥六月二十七日

皇帝遣正使汪楫副使林麟焟

封為中山王且

諭祭先王尚質更

恩賜御筆中山世土四大字匾額

頒賜國王王妃照先代之例其物件在案其勅曰
皇帝勅諭琉球國中山王世子尚貞惟爾遠處海隅
虔修職貢屬在冢嗣序應承祧以朝命未膺罔
敢專擅恪遵典制奉表請封朕念尔世守臣節
忠誠可嘉特遣正使翰林院檢討汪楫副使內
閣中書舍人加一級林麟焟齋勅封尔為琉球
國中山王并賜尔及妃文幣等物尔祇承寵眷
懋紹先猷輯和臣民慎固封守用安宗社於苞

桑永作天家之屏翰欽哉母替朕命故諭康熙

二十一年六月十一日

二十二年癸亥十一月初二日為謝

恩事遣王舅毛國珍紫金大夫王明佐等官齎捧

表文赴

京謝

恩所獻之物在案

欽賞國王緞疋三十疋

謝恩之例賞緞二十疋此番
加賞緞十疋共為三十疋

二十四年乙丑十二月初七日入貢

欽賞國王緞疋加一十疋共爲五十疋從此定五十

疋例

二十五年丙寅十一月初四日遣官生梁成楫

鄭秉均阮維新蔡文溥入監讀書

皇帝命工部建書房子監側以處之又三季給衣服

并給鋪蓋口糧日用等項從人冬夏給衣康熙

三十年辛未啓請歸省

二十八年己巳十月十三日

皇上恩准進貢兩船人數加增之疏共爲二百人數
接貢船隻亦恩免納稅嗣後琉球船湊足三隻
共免納稅

三十年辛未九月免進海螺殼三千個嗣後進
白剛錫一千斤

三十一年壬申十月二十五日爲進

貢兼謝

恩事遣耳目官馬廷器正議大夫王可法等賚捧

表文赴閩上

京所獻之物件在案

此時奉謝官生梁成楫等賜歸國

三十六年丁丑十月二十七日為接

貢並解送朝鮮難民事遣都通事魏士哲使者毛

應鳳等到閩

三十九年庚辰十月二十六日為進

貢事遣耳目官毛得範正議大夫鄭職良等賚捧

表文赴閩上

京耳目官毛得範上京時卒於浙江杭州府

四十年辛巳四月初十日爲解送難商陳明等

事特遣都通事鄭士綸副通事紅永祺等駕楫

船解送至閩本年六月回國時逢逆風於蘇州

府崇明縣界外擱破船隻員伴水梢皆登岸送

於福建越明年壬午六月內附搭接貢船歸國

時又於洋中遇颶風覆船

勅書欽賞及正議大夫鄭職良等皆沒於海中

四十五年丙戌九月二十七日為進

貢並解送難商游順等事遣耳目官馬元勳正議
大夫程順則等賫捧

表文赴閩上

京其難商游順等送與福建布政司

四十八年己丑七月十三日薨葬于玉陵在位

四十一年壽六十五

尚純

尚貞王世子也童名思德金母章氏聞得大君
加那志童名真鶴金號月順治十七年庚子正
月初五日降誕妃毛氏聞得大君加那志童名
思戶金有四妻惠氏福地阿護母志良禮童名
真錢金賀氏仲榮真阿護母志良禮童名真加
戶樽金景氏玉那霸阿護母志良禮童名真牛
金曦氏池原阿護母志良禮童名思戶金有三

男一女長子曰尚益王

毛妃所生

次曰松川翁主

榮仲

真阿護母志

次曰尚監

玉那霸阿護母志良禮所生

次曰尚

良禮所生

盈

池原阿護母志良禮所生

附紀

康熙八年己酉二月初六日領佐敷稱佐敷王

子

本年閏十二月十四日加領中城並知行高斗

三百斛稱中城王子

十五年丙辰五月初八日加領知行高四百斛
並久米具志川

二十八年己巳十二月二十八日換佐敷領久
米仲里

四十五年丙戌十二月三十日薨葬于玉陵壽
四十七

尚益王

王世子尚純之嫡長子也童名思五郎金母

毛氏聞得大君加那志康熙十七年戊午十月
 二十五日降誕妃毛氏野嵩按司加那志童名
 真鶴金夫人向氏西之按司童名真牛金有二
 妻孫氏知念阿護母志良禮童名真尹金詹氏
 宮城阿護母志良禮童名思戶金有二男四女
 長女曰嘉手刈翁主次曰古波藏翁主次曰尚
 敬王次曰尚徹俱妃毛氏野嵩按司加那志所生次曰思武樽
 金按司加那志次曰真牛金按司加那志俱宮城阿

護母志良
禮所生

附紀

康熙二十八年己巳十二月二十八日領佐敷

並知行高五百斛稱佐敷王子

二十九年庚午十二月二十三日加領宜野灣

三十一年壬申正月十二日加領知行高五百

斛

三十二年癸酉十一月二十六日加領知行高

五百斛

四十二年癸未正月二十五日換佐敷領讀谷山稱讀谷山王子

四十六年丁亥二月二十七日加領中城久米仲里稱中城王子

紀

康熙四十八年己丑十一月初七日為報祖喪事遣正議大夫蔡灼附搭接貢船到閩

本年十一月初七日爲接

貢事遣都通事蔡文漢使者向和聲等到闕

本年十一月十八日即位

本月二十日夜丑時

王殿回祿

王移於大美殿

四十九年庚寅十月二十二日爲進

貢事遣耳目官孟命時正議大夫阮維新等齋捧

表文赴閩上

京

五十年辛卯新作

王殿翼年壬辰二月二十一日

王遷新殿

本年七月十五日薨葬于玉陵在位三年壽三十五

中山世譜序

自古琉球與日本素脩隣交之誼而
遣發紋舟以通其往來一則以小事
大之義而一則足國裕民之故也至
萬曆年間適止紋舟以失聘問之禮
于是薩州

大守家久公謀深韜畧功侷桓文大發軍

師以正失禮之罪時

王尚寧無得爲辭遂服其罪今事事于
薩州已經九十年而其間所通亦不
可勝記今吾

國王尚貞德邁古今道冠百王萬機之
暇念及其事業將致于湮沒隨

命國相法司令司譜臣弘德等編譜呈

上是以博考舊案集其最要之事別爲
一卷附于譜末云

康熙四十年歲次辛巳九月二十七日

紫金大夫臣蔡鐸謹撰

世譜卷之一

尚清王

琉球自古與薩州為隣交時通聘間有紋船往來嘉靖年間為紋船使事遣天界寺月泉長老世名城主良仲到薩州

嘉靖年間為紋船事遣薛氏賀章

後曰江洲到薩州

尚永王

萬曆五年丁丑為隣交事遣天界寺修翁和尚

到薩州

八年庚辰爲隣交事遣普門寺到薩州

十三年乙酉爲隣交事遣天龍寺桃庵長老孟

氏安谷屋親雲上宗春到大坂

尚寧王

萬曆十九年辛卯爲紋船事遣建善寺大龜和

尚茂留味里大屋子到薩州

又爲紋船事遣護國寺快雄座主大里大屋子

到薩州年月不傳

二十一年癸巳爲紋船事遣天王寺菊隱長老
金氏摩文仁親方安恒到薩州赴京

又爲紋船事遣蔡氏中村渠筑登之親雲上政
茂到薩州年月不傳

本國爲薩州附庸者至此百有餘年矣專信權
臣邪名言遂失禮交之情而不脩聘問於是三
十七年己酉薩州太守家久公遣師來伐小

大難敵開城而降王從彼軍師到于薩州達
投誠之情次年庚戌薩州遣本田伊賀守等
使都鄙有章上下有服又遣阿多氏等正經界
均井地而始為抽稅田里辛亥年家久公垂
仁慈之念而許王田國每年納貢于薩州從
此始焉

同年九月十日家久公出賜一紙目錄此時
鬼界大島德島永良部與論皆屬薩州然今彼

五島容貌衣服留與吾國無異者原係吾國管轄之地故也不可不明故書于此

三十九年辛亥為稟出使中國事竣事毛氏池城親方安賴到于薩州赴駿府

本年為國質遣金氏摩文仁親方安恒到于

薩州次年壬子安恒沾病歸國嫡子松金安基代父留麿府

四十年壬子為國質遣向氏伊江按司朝仲向

氏羽地按司朝安到于薩州

四十一年癸丑為年頭使事遣馬氏伊計親雲

上良德到于薩州

年頭使始于此

本年為賀家久公誕生男子事遣向氏讀谷山按司朝宜赴于薩州

四十二年甲寅為國質遣馬氏國顯按司正弥到薩州

本年為國質遣阿氏阿波根親方守賢到薩州

四十三年乙卯為稟進貢謝恩王舅入中國事
竣回國事遣法司馬氏名護親方良豐到薩州
四十四年丙辰為十年質佐敷王子朝昌公
到薩州蒙免留十年同年冬任攝政歸國
四十六年戊午為賀家父公任宰相事遣尚
氏具志頭王子朝誠赴薩州
泰昌元年庚申為進香惟新公事遣馬氏伊
計親雲上良德到薩州

本年為弔國分御上薨事遣章氏安谷屋親
雲上正勝到薩州

本年九月為奏

尚寧王薨 尚豐王承祧事法司毛氏讀谷山親
方盛韶到薩州

尚豐王

天啓元年辛酉為謝承祧事遣尚氏父米中城
王子朝貞到薩州

六年丙寅為問候 家久公久客江府事遣法

司毛氏豐見城親方盛良到薩州

本年為弔 西之丸公薨事遣翁氏照屋親雲

上盛忠到薩州

七年丁卯春為賀 家久公陞中納言事遣尚

氏金武王子朝貞到薩州

崇禎元年戊辰為請琉球一紙目錄事一紙目錄原在

本國偶為逆徒被盜故有此使以請之遣波上山賴翁法印向氏

玉城親方朝智到薩州

三年庚午夏爲三年誥兼年頭使事遣法司向
氏國頭親方朝致到薩州

五年壬申秋爲賀網父公誕生事遣尚氏父

米具志川王子朝盈到于薩州癸酉年赴江府

七年甲戌春爲謝受封事遣佐敷王子朝益

公時命尚氏金武王子朝貞爲傳兼年頭使到

薩州上京

八年乙亥爲問安 光久公出痘事遣孫氏宇
根親雲上嗣盛到薩州

十年丁丑爲年頭使兼問安 家久公貴恙事

遣尚氏具志川王子朝盈到薩州

十一年戊寅爲弔 家久公薨事遣向氏勝連

按司朝盈圓覺寺復岩長老到薩州

本年爲賀 光久公家督事遣尚氏北谷王子

朝秀法司毛氏豐見城親方盛良到薩州

十二年己卯爲進香 黃門琴月公一周忌之
事遣馬氏棚原親雲上良正到薩州

十三年庚辰五月爲奏 尚豐王薨 尚賢王

承祧事遣尚氏具志川王子朝盈向氏越來親
方朝上到薩州

本年爲進香 黃門琴月公三年忌事遣阿氏
阿波根親雲上守真到薩州

尚賢王

崇禎十五年壬午爲三年誥兼年頭使事遣法
司章氏宜野灣親方正成到薩州

本年爲弔島津式部頭殿卒事遣惠氏久高
親雲上友氏到薩州

十六年癸未夏爲賀將軍長子家綱公誕生
事遣尚氏金武王子朝貞到薩州甲申年赴于
江府

本年夏爲謝承祧事遣馬氏國頭王子正則到

薩州甲申年赴江府

順治元年甲申為三年誥兼年頭使事遣法司
馬氏大里親方良安赴薩州

本年為進香黃門琴月公七年忌事遣毛氏
保榮茂親雲上盛紀赴薩州

二年乙酉為謝尚氏金武王子朝貞赴江府蒙
優待禮意事兼任年頭使事遣向氏讀谷山按
司朝宗到薩州

三年丙戌爲三年誥兼任年頭使事遣向氏國
頭親方朝季到薩州請免留三年故次年歸國
本年爲奏八重山島在番奉行賦銀事并請免
法司留薩州三年事更兼運糧船出洋損壞則
損係薩州事遣向氏平安座親方朝暢到薩州

尚質王

順治五年戊子夏爲奏
尚賢王薨
尚質王
承祧事遣馬氏國頭王子正則法司章氏宜野

湾親方正成到薩州

本年為賀

久平公

綱久初
名久平

完婚並犬追物事

遣向氏島添犬里按司朝庸到薩州

六年己丑為謝承祧事遣尚氏具志川王子朝

盈到薩州赴于江府

七年庚寅為賀

綱貴公誕生並謝尚氏具志

川王子朝盈赴江府蒙優待禮意事遣馬氏兼

城親方良正到薩州

本年為進香 黃門琴月公十三年忌事遣葛

氏座喜味親雲上秀名到薩州

九年壬辰為賀 光久公陞少將 綱久公陞

侍從事遣向氏越來按司朝信到薩州

本年為弔 將軍家光公薨事遣金氏欣武親

方安實到薩州

本年為賀 將軍家綱公連續事遣尚氏北谷

王子朝秀到薩州癸巳年春病故同十年癸巳

又遣馬氏國頭王子正則到薩州赴江府

本年為奏有欽差討還明印事遣毛氏澤岷

親雲上安定到薩州

十三年丙申為賀網久公入部事遣向氏勝

連按司朝賢到薩州

十四年丁酉夏為弔江府火災事遣毛氏真壁

親雲上盛有到于薩州

十六年己亥為年頭使兼賀網貴公元服之

事遣夏氏稻福親雲上賢道到薩州

本年為弔網久公母堂薨事遣馬氏新城按
司正陳到薩州

本年為謝本國掟條書事兼請免合力銀事遣
法司馬氏兼城親方良正到薩州

十七年庚子為朝覲事
中城王子朝周公到
薩州禮式全竣辛丑年回國

本年九月為稟遭火災因以重建王殿事辛丑

年遣向氏羽地按司朝秀赴薩州

康熙元年壬寅爲謝中城王子朝周公入覲

蒙優待禮意事遣法司向氏摩文仁親方朝維

到薩州

本年夏爲進香黃門琴月公二十五年回忌

事遣毛氏池城親雲上安憲赴薩州

二年癸卯因冊封勅使來臨本國爲捷報兼請

乞貢物併奉送天使之物件事遣毛氏保榮茂

親方盛紀到薩州

三年甲辰爲謝受封事遣尚氏大里王子朝亮
到薩州

四年乙巳先癸卯爲稟謝恩王舅向氏北谷親
方朝暢中朝歸國事遣御鎖之側職夏氏具志
川親雲上賢忠勢頭紅氏伊野波親雲上正安
到薩州

五年丙午爲賀 綱久公姬出嫁事遣顧氏上

江洲親雲上助豐赴薩州

六年丁未為啓奏事遣尚氏大里王子朝亮到

薩州

七年戊申為賀薩州翁主出嫁事遣向氏羽

地王子朝秀赴薩州

本年為賀網貴公任四位侍從事遣向氏金

武按司朝興到薩州

本年為弔江府火災事遣向氏太工廻親雲止

朝位到薩州

尚貞王

康熙八年己酉為稟 尚質王薨 尚貞王承

祧之事遣向氏越來按司朝信赴薩州

九年庚戌為謝承祧事遣向氏金武王子朝興
到薩州赴江府

本年夏為謝承祧事遣尚氏名護王子朝元到

薩州

本年夏為賀 綱貴公完婚事遣向氏讀谷山

按司朝基到薩州

本年為進香 黃門琴月公三十三回忌事遣

毛氏座喜味親雲上盛員到薩州

本年為稟進貢中朝事竣回國事遣吳氏我那

霸親雲上宗信赴薩州於洋中途逆風不回

十年辛亥為賀 綱貴公入部事遣向氏北谷

按司朝知到薩州

十一年壬子去庚戌年爲謝 將軍家綱公以
品物附賜事遣毛氏保榮茂親方盛定到薩州
十二年癸丑爲謝取回海賊所奪銀兩賜于本

國事遣馬氏平良親方良義到薩州

本年爲弔 綱父公泰清院薨事遣章氏龜山
親方正親到薩州

本年爲弔 御新造常照院薨事遣毛氏真榮
里親雲上盛平到薩州

十三年甲寅爲賀 太守光久公陸中將兼朝
覲事令中城王子尚純公到薩州禮式全竣
十五年丙辰之春回國

十三年甲寅爲賀 修理大夫網貴公任薩摩
守事遣向氏摩文仁親方朝憲到薩州

本年爲進香 泰清院公一周忌事遣毛氏小
祿親雲上盛聖到薩州

十四年乙卯爲賀 網貴公犬婚事遣向氏伊

江。按司朝敷到薩州。

本年爲問候。中將光久公貴恙事遣向氏屋
嘉比親雲上朝。茲到薩州。

本年爲進香。泰清院公三回忌事遣毛氏野

里親雲上安宣到薩州。屬地麿籠枕崎壞船不
回。

十五年丙辰爲謝。中城王子尚純公入覲蒙
優待禮意事遣法司向氏越來親方朝誠到薩

州

十七年戊午為奏出使中朝事竣回國事遣向

氏名嘉真親雲上朝衆到薩州

自此每貢使遣薩州

十八年己未為進香 泰清院公七回忌事遣

向氏玉城親雲上朝恩到薩州

本年為弔薩州火災事遣向氏中村渠親雲上

朝絮到薩州

二十年辛酉為弔 將軍家綱公薨事遣金氏

上間親方安時到薩州

本年爲賀 將軍網吉公連續事遣尚氏名護
王子朝元到薩州次壬戌春赴江府

二十一年壬戌爲賀 高輪翁主出嫁事遣尚
氏大里王子朝亮到薩州

本年爲奏冊封事並萬般啓奏事遣翁氏稻嶺
親方盛方到薩州

二十二年癸亥爲賀 菊三良公入覲事遣向

氏浦添按司朝式到薩州

本年為謝尚氏名護王子朝元赴江府事竣事
遣毛氏野嵩親方安平到薩州

本年為弔真修院薨事遣夏氏幸地親方賢
道到薩州

本年為弔菊三良公母堂薨事遣向氏名嘉
真親方朝衆到薩州

本年為弔酒井勒負佐殿夫人
綱久薨事遣翁
公女

氏當山親雲上忠祐到薩州

二十三年甲子爲謝受封事遣尚氏豐見城王子朝良到薩州

本年爲賀菊三良公元服事兼改名爲又三良事遣毛氏喜屋武親方盛勝到薩州

本年爲稟報待封王官禮事遣向氏富名腰親

方朝成到薩州

癸亥之冬下遣往之命至此年開洋

本年爲弔將軍綱吉公儲君薨事遣毛氏保

榮茂親方盛定到薩州

本年爲稟明去壬戌年中國商物價貴事遣夏
氏安里親方賢弘到薩州

二十四年乙丑爲稟謝恩中朝事竣回國事遣
法司毛氏池城親方安憲到薩州

本年爲進香 泰清院公十三回忌事遣章氏
安谷屋親雲上正盛到薩州

二十五年丙寅爲賀 綱貴公移居事遣毛氏

具志頭親方安敦到薩州

本年爲賀 又三良公入覲事遣蔡氏玻名城
親方由政到薩州

本年爲稟報小唐船於八重山遭大風損壞事
遣阿氏伊舍堂親方守淨到薩州

二十七年戊辰爲賀 中將光久公到任事遣
馬氏國頭按司正美到薩州

本年爲賀 網貴公家督事遣向氏金武王子

朝興到薩州

本年爲賀 太守綱貴公陞少將事遣向氏越
來按司朝意到薩州

本年爲賀 虎德殿誕生事遣向氏平安座親
雲上朝由到薩州

二十八年己巳爲賀 虎安殿誕生事遣毛氏
松堂親雲上盛福到薩州

二十九年庚午爲賀 吉貴公陞修理大夫事

遣向氏大里按司朝彛到薩州

本年爲賀 吉貴公定婚事遣翁氏安室親方
盛盈到薩州

本年爲賀 修理大夫吉貴公庖瘡全愈事遣
毛氏伊野波親方盛平到薩州

本年爲賀 薩州翁主出嫁事遣向氏奧間親
方朝祺到薩州

三十一年壬申爲朝覲事 佐敷王子尚益公

到薩州禮式全竣次年癸酉秋回國

本年爲賀 薩州翁主出嫁更兼尚益公傳事
遣尚氏北谷王子朝愛到薩州

本年爲候 中將光久公貴恙事遣向氏真榮
里親雲上朝涼到薩州

三十三年甲戌爲賀 修理大夫吉貴公大婚
事遣向氏羽地按司朝字到薩州

本年爲謝 佐敷王子尚益公入覲蒙優待禮

意事遣法司毛氏識名親方安依到薩州

三十四年乙亥為弔 中將光久公寬陽院薨

事遣向氏伊江按司朝嘉圓覺寺蘭田長老到

薩州

本年為進香 寬陽院公一周忌事遣毛氏野

里親雲上安常到薩州

三十五年丙子為賀 網貴公任中將事遣尚

氏恩納王子朝奇到薩州

本年爲賀 匠作吉貴公入部事遣向氏具志
川按司朝宜到薩州

本年爲進香 寬陽院公三年忌事遣毛氏中
座親雲上盛富到薩州

本年爲奏明載系貨船逢火災事遣毛氏富盛
親方盛命到薩州

三十六年丁丑爲弔麿府火災事遣毛氏太古
廻親方盛明到薩州

本年為進香 泰清院公二十五年回事遣馬
氏與那原親雲上良昌到薩州

本年為謝漂至人等皆許琉球直送中國事遣
向氏摩文仁親雲上朝暢到薩州

三十八年己卯為賀江府上野本堂告成事遣
向氏津嘉山親方朝虞到薩州

三十九年庚辰為進香 寬陽院公七年回事

遣翁氏稻嶺親雲上盛浮到薩州

四十年辛巳為奉賀龜姬翁主

綱貴
公女

定婚事遣

毛氏澤岷親方盛昌到薩州

四十一年壬午為啓進貢併接貢船今將所帶
之銀兩可增等因事遣翁氏具志堅親方盛武
到薩州

四十二年癸未為奉慰問江戸芝御屋敷御買
添御屋敷田町御屋敷皆逢回祿事遣毛氏伊
良皆親雲上盛誠到薩州

本年為啓前年接貢船去夏無歸而聞貨物漂
到薩州屬島旣浦故舊冬令貢使問其接貢船
之安否而今已過夏汛至秋未見貢船回國等

事遣翁氏富盛親雲上盛富到薩州

此時舊冬所遣貢船

二隻漂到大島地方于彼地撇貨物於大和船才府大文赴薩州其原船二隻駕回本國茲憑貢使稟報其接貢船去年六月歸時逢颶風覆舟于洋中員役皆溺死

四十三年甲申為奉賀 鍋三郎公弘目事遣

尚氏美里王子朝禎到薩州

本年為奉賀。綱貴公移徙薩州御本丸新宅。事遣章氏宜野灣親方正房先到薩州。其秋九月。綱貴公在江府而薨。

四十四年乙酉為奉賀。太守吉貴公家督事。

遣尚氏越來王子朝奇到薩州。

舊歲十月二十九日於江戶為

家督

本年為奉賀。吉貴公陞少將官位。事遣向氏。

豐見城按司朝匡到薩州。

舊歲十二月十一日陞少將官位

本年為奉賀 吉貴公改名稱薩摩守事遣向

氏平敷屋親方朝姿到薩州

舊歲十一月二十七日改名

本年為奉弔

大玄院公

綱貴公也

事遣向氏浦添

按司朝卓圓覺寺德叟長老到薩州

本年為進香 泰清院公三十三年忌事遣向

氏石嶺親雲上朝理到薩州

本年為進香 大玄院公一周忌事遣向氏上

與那原親雲上朝克到薩州

四十五年丙戌為奉賀將軍綱吉公賜殺於
吉貴公事遣向氏前川親方朝邑到薩州

本年為奉謝大唐船漂至土佐國今春回國事
遣向氏今歸仁親雲上朝哲到薩州

本年為進香寬陽院公十三年忌事遣向氏
松本親雲上朝資到薩州

本年為進香大玄院公三年忌事遣毛氏伊
野波親雲上盛祥到薩州

本年為奉弔龜姬翁主綱貴公女事遣毛氏熱田親

方盛守到薩州

四十六年丁亥為奉賀吉貴公移居於御本

丸新宅事遣毛氏保榮茂親方盛祐到薩州

本年為奉賀滿姬翁主吉貴公女定婚事遣向氏摩

文仁親方朝暢到薩州

本年為奉賀菟姬翁主綱貴公女定婚事遣向氏仲

由親方朝在到薩州

四十七年戊子為奉謝吉貴公令在番奉行

伊地知八郎兵衛殿問王體氣和平事舊年王有

疾聞於遣東氏高安親雲上政幸到薩州

本年為奉謝吉貴公命在番奉行伊地知八

郎兵衛殿弔先世子尚純公並賜奠儀事遣

毛氏安慶名親雲上安乘到薩州

四十八年己丑為奉弔將軍綱吉公事遣向

氏大宜味親方朝楷到薩州呈書翰轉達江戶

本年為奉弔

淨光院

將軍綱
吉公妃

事遣毛氏伊良

皆親雲上盛誠到薩州

本年為奉弔鳥井幡摩守殿夫人

綱久
公女

事遣向

氏國吉親雲上朝祥到薩州

本年七月十三日

尚貞王薨為報喪事遣温

氏森山親雲上紹喜到薩州

本年為請王世孫尚益公嗣王位事遣向氏

今歸仁按司朝季到薩州

尚益王

康熙四十九年庚寅為稟明舊冬王殿遭火災
深戚恐懼之情事遣向氏伊江按司朝嘉到薩
州

本年春吉貴公賜白銀二萬兩救飢舊冬十
月有大風國中大饑饉有王命發倉廩賑濟
而入春饑甚民不免餓殍至道殣相望故聞於
薩州因此吉貴公垂再生之德賜白銀周濟

飢民

本年為慶賀 將軍家宣公膺襲封事遣正使

尚氏美里王子朝禎副使翁氏富盛親方盛富

到薩州隨 太守吉貴公赴江府此時盛富仍

兼奉賀 又三郎忠休公元服事 舊歲四月二日鍋三郎公

為元服稱又三郎忠休

本年為奉謝 尚益王承祧事遣正使向氏豐

見城王子朝匡副使毛氏與座親方安好到薩

州隨太守吉貴公赴江府此時安好仍兼奉
謝賜銀救飢使事

本年為奉謝吉貴公遣安否使富山清右衛

門殿恤問尚益王丁憂並賜品物事遣毛氏

新城親雲上安房到薩州

此時安房兼向氏豐
見城王子朝匡贊議

官赴
江府

本年以年頭使向氏與古田親方朝上兼為進

香大玄院公七年忌事到薩州

本年為奉謝 吉貴公命在番奉行中神七右

衛門殿弔 先王尚貞王並賜奠儀事遣孟氏

志堅原親雲上宗相到薩州 此時宗相兼尚氏

議官赴江府 本年以饑饉之故從令多遣兼使

五十一年壬辰為奉賀 吉貴公陞中將官位

事遣尚氏與那城王子朝直到薩州 去年六月先遣尚氏

美里王子朝禎赴薩州時遇大風到讀谷山外壞船而卒故代遣朝直

本年為奉賀 吉貴公從江都賜休暇留歇薩

州事遣向氏前川親方朝邑到薩州

本年為奏預備請封料銀事遣毛氏保榮茂親

方盛祐到薩州仍兼奉賀又三郎公出痘痊

愈事

原賀又三郎公出痘痊愈之使者任馬氏名護親方良直已奉主命到薩州然

因於麁府有御家老之諭令前年赴江都使臣所蒙禮待甚厚者皆係吉貴公之為恩該以使者叩謝等由良直為謝禮使盛祐兼之

本年為奉謝尚氏美里王子朝禎向氏豐見城

王子朝匡赴江府蒙優待甚厚事遣金氏上間

親方安通到薩州皇書簡轉達江府

本年為奉謝尚氏美里王子朝禎向氏豐見城

王子朝匡赴江府蒙優待甚厚者皆係于吉

貴公調理事遣馬氏名護親方良直到薩州良

原為賀又三郎公出痘痊愈之使到薩州然

於麿府因有御家老之諭令乃為謝禮使向無

此例今於是乎始
本年為奉弔陽和院光久事遣毛氏池城親

方安本到薩州

本年為奉弔智性院

光久
公女

事遣夏氏兼城親雲

上賢年到薩州

本年六月蒙

吉貴公鴻恩令國王許稱中山

王按本國自古與薩州修聘書簡往復皆稱中

山王至于崇禎九年奉薩州之命改稱國司而

今吉貴公念本國素有王爵許稱中山王

本年將造營御書院因本國材木缺少具疏請

求買於薩州吉貴公念其回祿之由賜所請

之材木一萬九千五百二十五本

本年七月十五日 尚益王薨為報喪事遣向

氏玉城親雲上朝薰到薩州

此時玉城改名稱屋喜部

本年為請 王世子尚敬公嗣王位事遣向氏

玉城按司朝孟到薩州

中山世譜附卷序

蓋天地之間仁孝之道最爲重焉而
治國之方亦在于此矣昔者大王得
王季而爲子王季得文王而爲子文
王得武王而爲子武王得成王而爲
子皆賢君也而以仁孝治國故孔子
稱之曰宗廟饗之子孫保之其旨深

矣我

始祖尚圓王仁孝大德開基創業其後明
君更作良臣交起以至

尚豐王政教廣敷國家大治奈何
世子尚恭少年而薨

第二王子尚文爲人多恙不能即位

第三王子尚賢王立無世子因此

第四王子尚質王克承
父兄之鴻業而立本支綿綿弘開麟趾之
祥矣既及我

王即位則文風丕振大業益昌其功德無
愧于聖賢一日嘆然乃

諭國相尚綱等曰

尚恭

尚文不幸無嗣若不有譜而明之則將
後世無從考稽焉特

命向兆鳳等新修譜紀一卷以附世譜
之末於戲從今而後

二王子事昭然可稽燦然可邈不亦善

乎臣鐸等隨司譜官向兆鳳編成厥

譜恭備

上覽伏願

宗廟饗之

子孫保之而仁孝之治與三代並隆則
帶礪河山與天地永齊矣

康熙四十六年歲在丁亥十一月二十
一日紫金大夫臣蔡鐸謹撰

當官姓氏

攝政

司法司

總理司譜官

校正官

尚綱

馬廷器

毛起龍

毛天相

向兆鳳

松君昂

蔡鐸

世譜附卷

尚恭公

尚豐王第一王子也童名真三良金號良春母
尚氏我謝上森按司加那志童名真錢金號梅
岩萬曆四十年壬子二月六日降誕妃毛氏城
間按司加那志童名真加戶樽金號雲嶺有一
女浦添按司加那志童名思乙金號花牖

紀

萬曆四十六年戊午正月十五日領玉城

四十八年庚申十二月十日轉領浦添

天啓四年甲子五月二十八日領知行高三千

斛

崇禎四年辛未二月二十日薨葬于玉陵壽二十

尚文公

尚豐王第二王子也童名真牛金號德馨母尚

氏我謝上森按司加那志童名真錢金號梅岩
萬曆四十二年甲寅六月二十日降誕妃馬氏
大城按司加那志童名真鍋樽金號亮真

紀

天啓元年辛酉兼領佐敷中城
天啓年間領知行高千三百斛
崇禎七年甲戌二月爲謝國王尚豐受封事
奉使到于薩州時太守家久公隨將軍家

光公出在于京故直入京都見家父公致謝
又見家光公事竣本年十二月還國

康熙十二年癸丑正月二日薨葬于末吉陵壽
四十八

蔡鐸本中山世譜

昭和四十八年三月三十一日発行

編集兼
発行者
沖繩県教育委員会

印刷所
デイツク印刷所

那覇市松尾二四三―三
TEL 二三三一―五三六